

H. 2392

P. de Mouichet

DISCOVERS
POLITIQUE
AV ROY.

Par P. D. M.

A PARIS;

M. DC. XVIII.


THE NEWBERRY
LIBRARY

Cas
F
39

AVX LECTEURS.

326
1618
mou

IE vous aduise que ce Discours ayant esté
enuoyé par l'Auth eur en ceste ville de
Paris, au commencement de l'Assemblée des
Notables, dans un paquet fermé: Celuy au-
quel il s'adressoit, se treuuant absent, il a
demeuré prisonnier dans le papier, & retenu
par cest accident iusques à maintenant. Il y
a de bons tesmoins de ceste verité; de laquelle
ie vous ay voulu aduertir, afin que vous ne
pensiez pas qu'il ait tenu ou à la longueur,
ou à la faute de l'Auth eur que l'œuvre n'ait
esté plus tost esclos.



AV ROY. DISCOVERS POLITIQUE.



SIRE,

Aux mouuemens surhu-
mans de vostre Esprit, & aux
miracles de vostre Regne, on
reconoist que Dieu tient vo-
stre cœur en sa main, & vostre
Couronne en sa garde. Qu'il veut rendre vostre Estat
le plus heureux, & vostre Throsne le plus glorieux
de l'Vniuers. Pour cest effect il meut les Anges & les
hommes à vostre ayde : Ceux-la vous inspirent leur
intelligence, & ceux-cy vous donnent leur aduis en
ce grand dessein : Les Anges vous descouurent la
beauté diuine, & l'ordonnance de sa perfection : les
hommes la decence de la Monarchie & l'ordre de sa
iustification : afin que conjoignant & imitant ces
parfaictes formes en vostre domination, vous vous
rendiez diuinement & humainement parfait : le
plus pieux & plus iuste Roy qui fut iamais; le respect
des plus éleuez, & l'admiration des plus accomplis

A ij

qui viuent: & vostre Empire le meilleur & plus fortuné du monde. Ores donc que les Anges d'une part, & les hommes de l'autre vous suggerent leurs sentimens pour vne si glorieuse fin; Aggréez, Sire, que le mien se porte d'une mesme intention à vos pieds, accompagné de mon cœur: & si l'un se treuve indigne de vos yeux par son peu de merite, que l'autre se treuve digne de vostre grace par son affection; & me fasse sentir l'excès de vos bontez en l'adueu de cest ouurage, que i'ay dressé non pour me faire voir homme d'Estat, mais tel que ie suis, zelateur du bien Public, & de vostre honneur, auquel ie recognois estre deu tout ce que la Vie que ie vous ay vouëe me permettra d'escrire, & d'inuenter pour le bien des hommes. Ce but estant vostre soucy, doit estre aussi tout mon estude, & le subiect de ce Discours que ie commenceray par nostre bien, pour le finir par vostre gloire.

Le Bien, Sire, est l'object de la Nature, la cause de son mouuement, & le terme de son repos. C'est à luy que vont tous ses appetits, & que tendent toutes ses parties; sur toutes l'Homme chef de son œuvre, & la guide de ses effects, qui le suit desirusement, & le poursuit asprement par tout, se tournant sans repos vers les causes qui le contribuent, & vers les sujets qui l'ont: Mais par ce que tant plus que ces causes & ces sujets sont diuisez, il est plus petit & moins durable par leur diuision qui l'amoindrit; & tant plus qu'ils sont vnis, plus grand & plus durable, par leur vnion qui l'augmente: il a falu que les hommes qui sont les principales causes & les meilleurs sujets du Bien, pour le rendre grand & durable, se recueillissent en Corps Populaires, & formassent ensemble

de communes Espèces d'eux & de leurs biens , reduites en Estats bien dressez de leur vnion. Ces Estats s'appellent Societez Ciuiles, & leurs gouuernemens Polices; desquels on fait trois genres : mais les deux pour receuoir pluralité de chefs, & confusion de principes, comme Mōstres à plusieurs testes, ne peuuent long temps subsister : La seule Monarchie fondee sur vn Dominateur se peut rendre bien-heureuse, & perpetuer sa fœlicité, y gardant l'ordre & la raison que la Nature garde en l'Homme, où elle a tiré sa forme racourcie, & mis l'exemple de tout ce qu'il faut faire pour bien ordonner son Estat.

Or celuy de vostre France, Sire, auquel ie porte mes considerations, & rapporte mon Discours, tenant ja beaucoup du modele que ie luy propose, se peut sur tous reduire à sa conformité, en imitant sa disposition, & aller par mesme train au grand & durable bien auquel il tend.

On sçait assez que l'Homme est composé de quatre Elemens, desquels descendent ses quatre humeurs & puissances naturelles, c'est à sçauoir du Feu, duquel sort la colere, avec l'attraction & l'elevation, de l'Air qui produit le sang avec l'expulsion & l'animation, de l'Eau qui engendre le flegme avec la purgation & mundification, & de la Terre qui fait la melancholie, avec la depression & retention en l'œuure de sa nature. Et que de l'excès ou du vice de ces quatre substances, & de leurs facultez naist leur discrasie, & le desordre de leurs actions, avec tous ces maux interieurs qui en fin donnent fin à sa vie. Mais que si elles sont vnies en vn corps bien meslé, réduit à vne iuste & droicte symmetrie des parties externes & internes de sa composition, qui leur don-

ne leur ordonnance & figure conuenable, & vont d'accord en vne deüe proportion de quantitez & de qualitez (pures & nettes d'humeurs estranges) sous les vertus du premier acte qui les meut, il en naist vne libre & vigoureuse action de leurs puissances, qui de plus en plus accroist le bien de son sujet, & assure sa duree.

Pareillement ceste Monarchie est composee de quatre Ordres, comme de ses Elemens. De l'Eglise, son feu & sa colere, qui doit estre plaine d'elans & de saincts attraits pour avec soy nous eleuer à Dieu. De la Noblesse, son Air & son sang qui doit tout animer de son courage, & repousser les ennemis. De la Iustice, son eau & son flegme qui doit mundifier & iustifier l'Estat. Et du Peuple, sa terre & sa melancolie, qui se doit abaisser aux œuures & artifices de l'vtilité, & retenir les loix & formes qu'on luy donne. Et des proprietiez qui en descendent se qualifie sa constitution & se forme bien ou mal son Estat, selon que ses parties sont bien ou mal disposees, en elles mesmes, & entre elles.

Bien, si elles sont deüement proportionnees avec decence & moderation, & regees en vne ordonnance conuenable à toutes pour se mesler harmonieusement, & conjoindre en vn seul corps politique, pur & net de tous vices & meslanges estrangers, par vn seul acte qui vnisse & maistrise tous leurs mouuemens (comme vn ressort plusieurs rouages) dās la puissance & sous les loix du premier Moteur.

Mal, si ces Ordres perdent leur Ordre, confondent leur offices, excedent leurs proportions, desreglent leurs exercices, alterent leurs humeurs, souillent leurs bonnes mœurs, & si leurs mouuemēs s'al-

7
humans à la violence, ou s'estaignans au repos, perdent leur temperament, & se desrobent du commun concert, & de la puissance du premier acte qui les tient vnies & les guide.

Si bien, quatre grands Biens en naissent eminens sur tous les autres, & auxquels tous les autres sont compris: La Religion, lumiere de nostre ame, qui luy fait voir Dieu son soleil, à trauers la nuee de son corps, & pendant ceste vie l'vnit à luy, comme à son souuerain bien, avec amour & crainte. La Iustice, l'azile & le niueau de la raison, qui nous fait la voye du bien droicte & facile, rendant à tous ce qu'ils meritent; & nous sauue par les perils du monde de l'oppression du mal. La Paix, l'image & l'auantgoust du parfaict repos qui porte avec elle toutes sortes d'aides souhaitables, & fauorise par sa tranquillité l'estude & les œuvres de nostre bien. Et la Santé vie de nostre vie, & l'ame de nos plaisirs, sans laquelle tout contentement meurt en nous, & tout pouuoir nous défaut pour nous porter au bien.

Si mal, quatre Maux principaux en sortent contraires à ces quatre grands Biens, sous lesquels sont tous les autres: l'Irreligion, forcierre de nostre iugement, Demon d'erreur & de tromperie, qui par son illusion desuoye nostre pieté du chemin royal, pour la tirer aux precipices. La Guerre de naturee violence de la nature inhumaine fureur de l'Humanité, qui la fait desfaire à soy mesme, qui met tout en confusion & perdition, & en ses effets ruine ses auteurs & ses causes. L'Injustice, hydeuse difformité de nos actions; outrageuse tyrannie de nostre vie, la mere nourriciere de tout vice, & la naturelle de tout malheur. La Maladie, viue gesne de nostre sens, l'amen-

table mort de tous nos aydes, & l'empeschent de nos vertus.

L'Irreligion est le premier mal, par laquelle ie n'enten point vne priuation de toute religion, car ce seroit vn Atheïsme, prodigieuse impieté que ie ne croy point tóber en vn esprit raisonnable, ou s'y arrester si elle y tombe; ny se trouuer homme, s'il n'est furieux, qui dans les merueilles du monde ne recognoisse vn adorable autheur infiniment bon qui les a faites: puis que rien ne se fait de soy, que l'aduéture ne fait rien ny le neant, & que ce qui est bien fait a sa cause bonne. Mais i'enten par l'irreligion, vne religion autre que la vraye, ou vn culte indecent & vitieux en sa profession: La premiere espece naist ou de presumption, ou de foiblesse, ou de precipitation de iugement: & la seconde d'indeuotion & de licence. Ainsi pour irreligieux i'entens au premier chef, ceux qui ne tiennent point la religion ancienne & commune, mais vne autre qu'ils croient estre meilleure: Et au second, tous ceux qui negligēt ou auilissent la religion par leurs deportemens vitieux; comme sont les Ecclesiastiques desbauchez & faineans, qui en prophanent le ministere, & font accuser l'Eglise de leurs crimes; d'où naissent les mauuais sentimens, & apres les heresies. Des premiers il se treuve deux sortes, les vns irreligieux couuertement, & les autres à descouuert; ceux-là dissimulans leur sentiment par vne prudence politique; ceux-cy le manifestans sans iugement d'un zele inconsideré. Les premiers parce qu'ils ne sont connus que d'eux-mesmes, n'interessent qu'eux mesmes par leur irreligion: les derniers, bien qu'ils interessent la religion, s'ils font partie du cors Politique, sont neant-moins

moins tolerables pour le bien commun ; pour-
ueu qu'ils vivent selon les loix du Prince , & les re-
gles de l'Estat : & le corps Politique demeurant sain
& paisible avec eux, il ne leur faut point mesfaire, ny
vser d'aucun effort d'Estat pour ramener leurs es-
prits : Car encor que l'Eglise soit vn membre de la
Monarchie, la Religion, qui en est l'ame, ne depend
point des Regles de l'Estat, ains autant que les reme-
des du corps humain sont differés de ceux de l'ame,
ceux de l'Estat le sont des remedes de la Religion:
Les remedes du corps en l'homme sont volontiers
la saignée & la purgation; ceux de l'ame la raison &
la patience: qu'on iuge si ceux de l'un peuuent estre
propres à l'autre, & quelle erreur ce seroit de trans-
porter les remedes de l'Estat aux maladies de la Re-
ligion. L'experience nous a monsté qu'elle n'en
peut receuoir d'austeres & de violens: & qu'il a esté
bon de permettre aux nouueaux Religioneux ce
qu'on ne peut empescher, qui est de croire ce qu'ils
ne peuuent encor mescroire en la foy. Il faut donc
laisser leurs Esprits en paix, & leur conscience en li-
berté; car aussi bien l'auroient ils libre au dedans,
quand on la forceroit au dehors: leurs maladies sont
en la raison qu'il faut guerir par la raison mesme,
assaisonnée de douceur & de patience: par elle avec
le temps la verité prenaut, & dissipe l'heresie comme
le soleil vn nuage: & sur tout il se faut garder d'aigrir
le mal par la violence d'aucune euacuation, qui em-
porterait le bon avec le mauuais, tant ils sont mellez
ensemble, attendans la cryse naturelle & les effects
de Dieu. Puis que le mal est en l'Esprit qu'on n'of-
fence iamais des esprits malades; qu'on se garde de
les harceler, pointiller & presser en aucune sorte, de

peur de les esfaroucher, & les porter à la diuision, qui pourroit donner occasion & moyen aux factieux de se seruir de son aigreur & de ses armes contre l'Estat & le Souuerain, comme elle à fait autrefois.

Qu'il n'y ait plus de Disputes de la Religion ; car l'altercation engendre la querelle, & ceste cy les mouuemens ennemis, & la guerre en fin. Que les Maistres & Predicateurs en preschent & enseignent la Doctrine avec modestie, se tenans sur la Positiue & Confirmatiue sans plus; fuyuans par tout la Controuerse, qui ne fust ny ne sera iamais le moyen de vaincre les opinions: c'est plustost le fusil qui les allume, & le soufflet qui les enflamme: car les opinions sont des folies que la contestation accroist: La Controuerse est la fertile pepiniere des doubtes qu'elle fait naistre es esprits qui n'y auront iamais pensé, plus ingenieuse à construire qu'à destruire les nouveautez. C'est vne forge de nouvelles armes aux religions contraires, pour de plus belle s'offencer: & vn combat de consequence où le danger est respectif. Disputer de la foy c'est la conuertir en opinion; & mettre en doute ce qui doit estre indubitable: Mais quelle dispute sans passion? & quel iugement s'il est passionné? la raison non disputee mais consideree avec attētion suffit aux esprits de paix & de douceur pour apprehender la verité.

Le second mal qui arrive des vices & fautes de l'Estat, est la Guerre ciuile, fleur aigue qui le consume & ruine bien tost s'il n'y est remedié. Les causes principales en sont (apres les disputes & querelles de la Religion dont nous auons parlé) la communication trop priuée que le Prince dōne aux Grands de ses secrets: La licence trop absolue qui leur est per-

mise : le mespris & refus du Souuerain en leur endroit : La foiblesse de ses armes, & de ses finances : La violéce ou lascheté de sa domination : & l'oppression & foule du Peuple. La premiere donne le iugement aux Grands d'entreprendre contre luy, la seconde le pouuoir, la troisieme le pretexte, la quatrieme l'occasion, la cinquiesme, la hardiesse, & la derriere le subiect à ses subiects de s'esmouuoir.

A la verité il n'y doit point auoir trop de conuiction ny de priuauté des Grands avec le Prince ; car elle engendre trop de connoissance, & celle cy le scauoit de luy mesfaire. Il faut beaucoup de distance & de distinction du Monarque avec les Grands de son Estat pour son assurance & sa dignité. Ils le peuuent environner comme estoilles, prenans de luy leur esclat ; mais non comme d'autres soleils qui luissent de leur propre feu. Ils luy peuuent assister comme parties de son honneur, mais non comme compagnons de sa gloire. S'ils sont trop voisins de la Royauté ils en deuiennent amoureux, & audacieux, s'ils sont trop esleuez en son Emphyree. Les Anges plus hauts sont infiniment distants de la Maiesté de Dieu, celle des Roys le doit estre aussi de ses Grands plus grâds, puis que les Roys sont les Dieux de la terre. Mais aussi le Souuerain doit recognoistre leurs merites, & honorer leurs qualitez sur routes : ietter sur eux les plus clairs rayons de sa lumiere ; & leur departir ses plus riches & grandes faueurs, il faut qu'il leur commette comme à ses demi-Dieux les premieres puiffances de sa Deité, les esleuant vers soy (sans s'abaisser vers eux) à vne raisonnable distance de son thronne : Il les doit faire ses Conseillers ; mais non pas ses Affecteurs : leur communiquer ses affaires, mais non

pas ses intentions : leur prester la verge de son autorité, mais non pas le sceptre de sa direction : les priser tousiours sans iamais les flatter: leur deffendre le demander, & leur donner ce qu'ils meritent : se prendre de loing garde à leurs forces, sans monstrier de craindre leur pouuoir : Ne les auoir en sa Cour tous à la fois; mais les vns apres les autres: Réténir les plus suspects, & enuoyer loing les plus fideles: les iuger par leurs œuures, & non par leurs aduis : Par ce moyen, n'ayant ny connoissance des occasions, ny subiect de se plaindre, ny moyen de s'autoriser d'eux mesmes, ils n'auront aussi le pouuoir de faire ny d'engendrer la guerre.

Quant à la violence ou lascheté de sa Dominatiō, l'vne luy engendre de la hayne, & l'autre cause son mespris, & toute sorte d'entreprises & de desordres en son Estat. Aussi l'impuissance de ses Armes & de ses Finances donne occasion & moyen à ses Ennemis de l'esbranler & dissiper. Pour empescher ces malheurs il doit estre triplement puissant, En bons hommes & instrumens de Guerre; En deniers bien maniez; & en Ains infallibles: Mais sur tout courageux d'effect & de semblant, & guide d'un bon & fidele cōseil pour mettre ces apareils en œuvre, qui feront mourir le courage à ses Rebelles, estonneront ses ennemis, rehausseront son honneur, & asseureront sa fortune.

Pour la derniere cause qui est l'oppression du Peuple; Ou elle vient du vouloir du Prince, ou de la tyrannie de ses Officiers: Si elle vient du Prince, le danger en est plus grand, & les mouuemens qui en naissent plus dangereux & plus durables, parce que l'offense est plus sensible de celuy qu'on a le plus aimé

& la haine en deux grands sujets indignez, moins reconciliable, comme les bouts diuisez d'une grosse corde plus mal aisez à renouer. Car le Prince qui doit cherir ses sujets comme un pere ses enfans, est fait non pour l'outrager, mais pour le protéger: Que s'il oublie son deuoir, & les presse trop ou par de rudes traitemens, ou par de charges insupportables, le peuple oublie aussi tost le sien, & s'éfarouchât cōme un animal sauvage perd l'amour & le respect qu'il luy doit, se donne à la fureur cōtre luy, & se precipite quelquefois aux armes que la peur du chastiment apres l'empesche de quitter. Non que la rigueur ne soit quelquefois necessaire au Prince pour l'execution de ses volontez, mais il ne doit iamais venir à l'entiere & absolue: Tout ainsi qu'il est bien permis en la Musique de pancher parfois aux medietez harmoniques qui ont de la dureté, & entremesler les seueritez de la Cromatique pour la perfection des accords, mais non de venir à une plaine Diatonie: Les aigreur du Souuerain ne doiuent iamais estre sans douceur, ny la pointe de sa rigueur faucher tout outre sa clemence: Il doit presser non opprimer, corriger non pas desfaire, se mōstrer pere courroucé, non pas ennemy vengeur: afin que la crainte de ses sujets ne soit point sans amour, ny sans fidelité leur obeissance.

Mais quand il les foule par tailles excessiues & insolés impos, il ressemble au foye discrasie d'une chaleur estrāge, qui retirant à soy tout le sang du corps, le perd par son deffaut & se perd par sa redondance, par ce moyen le chef oste la vigueur aux membres qui le doiuent conseruer, & sans y penser la vie à sa propre substance: & ce malheur n'arriue guere qu'avec les symptomes des emotions & de la rebellion.

Si ces maux viennent des Officiers du Prince, le peuple est esmeu plus promptemēt, mais aussi plus-tost remis pour le respect du maistre qu'il excuse. Neantmoins le Souuerain ne se doit iamais seruir d'hommes auares, passionnez ou ineptes; Car passant ses volonteiz par des instrumens gastez & mal faits, elles se gastent, paroissent autres qu'elles ne sont, & causent de mauuais & perilleux effects.

Quelquefois le peuple est fort patient, & comme insensible aux coups du mal dont on le trauaille; il se plaint, gemit, & supplie, & n'estant point ouy ny soulagé, il esclate en fin, ou cherche parti sans faire effort, se cantonne pour se deffendre, & préd l'effort de sa liberté quand son obeissance le ruine.

Pour le François, il est capable des plus grandes affections, mais sujet aux plus grands desdains & aux plus fieres passions des hommes. Il est de soy plein de candeur & de loyauté comme le pur argent, infusible qu'à la fournaise: Mais en ce temps il tient du plomb de ses voisins, qui le fait fondre au moindre feu de sa passion, & le rend trop mobile & remuant en sa liqueur. Il tient aussi du cuire de ses alliez, qui le rouille en vert & en liuide, luy faisant esperer & craindre le mal au milieu du bien. Pour le reduire à sa nature & à son prix, il le faut peu à peu demeurer de la glus des estrangers, & le sevrer de leur lait, qu'ils luy donnēt bien mauuais en luy succant le bon. Il le faut nettoyer lentement de leurs humeurs qui ont changé ses meurs: leur interdisant la residence & le trafic en cest Estat, & aux François dedans les leurs, sans permettre aux vns & aux autres que les passades. Car s'ils se meillent en leur diuersité, leur repugnance causera leur deprauiation: Au corps humain,

15

& en l'œuvre le plus vâré, la chose estrange corrompt la nature, & empesche la perfection.

La France n'ayât de rien besoin, se doit reduire toute à soy, sans sortir dehors, cōme l'vniuers du Timee. Car comme les generations naturelles ne se peuent faire ny parfaire, si les manières ne demeurēt stables, & cloies en leurs matrices, estant necessaire que du corps mobile, le lieu soit immobile, pour se mouuoir droittement & naturellement: Ainsi vn Estat n'a iamais vn bon Estat pour subsister & se parfaire, si les naturels vaguent hors de son ciel & de sa terre.

Dauantage, pour redresser & refaire ce peuple si changé, il est besoin de l'exercer, sans le laisser trop en repos, afin que par l'action il perde ceste rouille estrange qu'il a cōtracté, quil'ulcere & ronge en l'oisiueté, & qu'il puisse contenter la viuacité de ses esprits qui ne peuent chōmer sans se corrompre. Et comme en l'vrine du malade le repos desfait l'hypostase, & desvnit sa substance, que l'agitation rassemble: Ainsi l'oisiueté deslie l'vnion de son corps ciuil, & diuise ses parties que le mouuement remesse.

Ses exercices luy doiuent estre vtiles & non pas vains, communs à tous, principalement celuy de ses functiōs, & de ses ieux publiques, qu'il seroit bon de remettre ou d'introduire en toutes villes, & faire que tous les ordres y cōtribuassent & s'y exerçassent ensemblemēt, pour s'entretenir en amour par la compagnie. C'est pourquoy (& pour d'autres considerations que ie diray) il les faudroit faire viure en mesme enclos, & sous vne mesme Police, leur interdisant la separation, & la demeure des champs, fors qu'aux temps des œuvres champestres: Meismement à la Noblesse, qui a quatté tout à fait les villes où elle

est la plus necessaire, Et mesprise les charges publiques par fantasie plus que par raison, à son interest, & au dommage de l'Estat: le gouvernement public restant par son deffaut en temps de guerre sans chefs & sans appuy, & en la paix sans lustre & sans harmonie: Car quel concert si l'une des quatre parties y deffaut? Elle reste aussi par ceste faute sans assistance, & sans autorité, sans plaisir & sans asseurance.

Sans doute cest esloignement la separant de la communion du corps, diuise son intelligence de celle des autres parties, qui la tiennent apres suspecte, voire le Prince mesme, voyant qu'elle fuit les yeux du peuple, & ne veut point de tesmoins de ses actions ce qui faict qu'il s'en prend garde, & qu'elle entre en ombrage, d'ou vient l'aigreur de l'un, & la peur de l'autre, & quelquefois la guerre: Car en ceste diuision, le feu des violens treuve son issue libre, & l'esprit des ambitieux assez escarté, pour fondre roidement sur leurs compatriottes, au moindre vent qui souffle de trauers. Là où les Gentils-hommes viuans dedans les villes meslez avec les autres Citoyens, & entre eux mesmes, les bons empescheroiēt les mauuais, les doux modereroient les violens, les genereux accourageroient les timides, les vertueux amenderoient les deprauez, & les illustres esclaireroient les obscurs, d'un temperament agreable qui consumerait le bien & l'harmonie publique.

Je passe à l'injustice, elle est, Sire, la generale cause de tous maux que le dereglement engendre en l'Estat: Et c'est le dereglement mesme de l'ordre & de la raison qui le doit maintenir. Elle luy oste par sa difformité toute decence, & toute droiture par ses obliquitez. Mais en sa definition speciale, c'est vne
d'irraisonna-

de fraisonnable distribution de biens, honneurs, & loyers, en la chose priuée, & publique: Et vne indigne souffrance de la violence des meschans, & de l'oppression des bons. Le premier effect oste la balance à la iustice, & le second l'espee: Balance par laquelle elle doit, entre le droit & le tort, entre le merite & l'indignité, peser la cause d'un chacun au poix de la raison naturelle & ciuile, iusques aux grains & aux scrupules. Espée par laquelle, entre la conniuen- ce & la precipitation, entre la rigueur & l'impunité, elle doit deffendre l'innocéce, & sacrifier les crimes au bien & au repos public. Ce Monstre tortueux se mesle hideusement par tous les Ordres de cest Estat, le peuple en est depraué, l'Eglise peruerbie, la Noblesse enuénimée, & la iustice corrompue.

En l'Eglise n'est-ce pas injustice que les ignorans & débauchez ayent ses biens & ses Dignitez, & les vertueux & capables en soient priuez? injustice que les lais & prophanes mangent les saincts reuenus, & que les Ministres de Dieu meurent presque de faim & par leur souffrere des-honorent leur Ministere? injustice qu'on fasse marchandise des maisons de Dieu & qu'on trafique de ses heritages? Injustice que les vns soient affairlez sous le poix enorme des Benefices, qui leur engraisent le corps & amaigrissent l'esprit, & les autres n'en ayent qu'un loppin qui meritoient d'estre les mieux partagez? Injustice qu'on conioigne les incompatibles, & que tant de Bergeries demeurent sans Pasteurs? Et injustice que les Ecclesiastiques s'empeschent des affaires seculieres, & messent confusément la terre avec le Ciel.

En la Noblesse est-ce pas injustice que les Roturiers tiennent ses fiefs sans en auoir la qualité, & qu'ils

en portent les tiltres sans annoblissement? Que les nobles se meslēt des offices des vils, & les Seigneurs du traffic du peuple? Qu'ils dōnēt leurs iustices à des ignorāns, & deposent les dignes quand il leur plaist? Qu'ils tyrannisent leurs sujets & les obligent à des charges indües? Mais injustices sur toutes injustes & dénaturées, qu'ils cherchent leur honneur en leur déffaicte? Qu'ils tournent leurs armes contre leur Prince, & leurs affections contre leur pays?

Quand à la Iustice son injustice est la formele & plus pernicieuse de toutes; par ce qu'elle est la cause des autres les souffrant & les commettant, Elle qui deuroit estre la terreur de la Malice, & la mort de l'iniquité. Quatre vices remarquables des Iuges de la France font degenerer & conuertissent la Iustice en injustice, qui sont l'Auarice, l'ambition, la faueur, & la crainte. Vices qui gastent l'integrité des plus iustes, & qui esbranlēt la constance des plus asseurez. L'Auarice les rengen du parti de ceux qui leur dōnent ou leur doiuent payer ce qui leur est deu. L'Ambition les porte à contrecarrer les plus autorisez, & à contredire & contretenir les aduis les plus iustes & mieux deduits. La faueur les incline du costé des amis presens ou recommandez. Et la crainte les empesche de iuger contre ceux qui leur sont redoutables. En ces quatre pechez de iustice les vns se couurent mieux & plus dextremement que les autres, afin qu'on ne les remarque; Mais Dieu les voit, & l'intéressé les sent. Le premier mal naist d'un grand abus entre autres, honteux, & intolérable, qui consiste en ce qu'il faut que le peuple achete la Iustice qu'on luy doit, & que les Iuges la vèdent à deniers cōtans aux parties, sous le nom & couleur d'espices: sordi-

de & mercenaire inuention , qui empesche les pau-
 ures d'auoir raison des torts qui leur sont faits, & qui
 sallit avec les mains des Iusticiers, l'honneur sacré de
 ceste fille du Ciel. Le remede en seroit, Sire, qu'il
 pleut à vostre Majesté, ordonner de suffisans gages
 aux Iuges, moyennant lesquels ils rendissent la iusti-
 ce gratuitement à tous, comme il se fait és autres E-
 tats bien policez. On les peut tirer de plusieurs ex-
 pediens qui ne toucheroient point à vostre interest,
 & ne pourroient estre fascheux à vos subjets. Mais
 pour porter les Iuges à leur deuoir qui pourroient
 se rendre negligens, Il faudroit practiquer exacte-
 ment les Mercuriales, & introduire les pointes en
 leurs compagnies. Le second vice qui est l'ambition
 procede de l'estrif ou emulation des Iuges pour leur
 propre autorité, & de l'amour & raisonnement trop
 specieux qu'ils portent à leurs opinions, esquelles
 vn chacun veut paroistre & s'autoriser: pernitiense
 ambition qui leur fait quitter la verité pour la para-
 de, & l'amour du droict pour celui de la reputation
 & de la victoire. Le remede en seroit de faire opiner
 les Iuges simplement sans discours ny affecterie, &
 les obliger par vn serment special de n'affecter ia-
 mais de s'autoriser & paroistre, mais de bien-juger.
 Le troisieme vice est la faueur que la sollicitation
 des Grands ou des amis opere à l'endroit des Iuges,
 les esbranlant pour si fermes qu'ils soient: le reme-
 de seroit de déffendre toute sollicitation manifeste
 & couuerte, de parole & d'escrit, & astreindre les
 Iuges par vn serment particulier de ne la permettre
 ny souffrir en aucune sorte: ô quel soulagement au
 peuple qui fait de si grands frais, & se vexe tant à la
 sollicitation! Mais quel repos à l'estude & conscien-

ce des Iuges, que les sollicitateurs troublent tant ! Le quatriesme naist du respect, commandement, ou menace, de ceux qui peuuent nuire aux Iuges, & son remede seroit que leurs aduis fussent tenus secrets avec religion, & le registre caché sur de grandes peines contre ceux qui les descouvroient.

Ces vices de vos iusticiers, Sire, leur attirent grandement la haine du peuple : Mais l'arrogance de la pluspart les rend encor plus odieux aux hommes d'Eglise & de Noblesse, qui s'en ressentent tous les iours. Ils ont raison de se plaindre de leur mesconnoissance qu'ils ne scauroient excuser : Il y a bien à dire de la grauité qui doit faire reuerer les Iuges à ce faste insolent, l'une est comme vn flegme doux qui les fait aimer avec respect, & l'autre vne acre bile qui donne du desdain à tous.

Pour le Peuple, l'iniustice y faonne des Hydres à mille testes, qui sont les procès naissans du tort & des injures que les vns font aux autres sur autant de sujets qu'il y a d'affaires & d'accidens entre les hommes, quelquefois immortels en duree, quelquefois mortels à leurs fortunes & à leurs vies. Leur maladie est la fieure ethique de la France qui la consume lentemēt, & la perdra si vous n'y apportez, Sire, les remedes qu'on n'a peu, mais bien voulu treuuer encor, pour esteindre sa malignité. De moy i'en reconnoy deux principaux en leur matiere, sans toucher à ceux de leurs formalitez si bisarres & differentes en ce Royaume.

Le premier seroit la certitude de ce qui est vraymēt deu à vn chacun & de ce qu'un chacun doit au vray : Comme ceste ignorance est la cause qui remplit tout de differens & de confusion : donnant moyen

aux trompeurs & aux insolubles de circonuenir les bons à couuertir: par vne fauce parade & apparence de moyens, sur laquelle les faciles hazardent de bonne foy leurs biens, en toutes sortes d'actes: & apres se treuuent de mauuaise foy deceuz; & les choses toutes autres qu'ils ne s'attendoient: d'où naissent les questions & les procès. De la vient aussi qu'on noze en ce peril ny prester ny traficquer à la ruine du bien commun. Donc pour tarir ceste grád source de procès & de malheur, il faudroit oster l'incertitude des facultez d'autrui, & voir clairement les moyens d'un chacun. Ce sçauoir tres-vtile est possible; & ne peut estre fascheux que par fantasie, car il est iuste & raisonnable par necessité: Il est possible en ordonnant que chacun fust tenu de bailler par declaration tout ce qu'il possederait au vray des biens immeubles, & en deniers courans & apparens; & ce qu'il deuroit en debtes ou hypothecques passives, avec leurs augmentations & diminutions dès qu'elles seroient faites, & ce deuers des Notaires ou Greffiers publiques qui la receuroient & l'expediroient à tous ceux qui en auroient à faire; y obseruant la meilleure forme que meriteroit ce remede, qui demeure preiugé par l'enregistrement qu'on fait és cadastres publiques des tenances d'un chacun, que s'il se treuve bon en partie, pourquoy non du tout?

Le second remede, Sire, qui regarde la plus fertile matiere des procès criminels seroit, de regler les rangs & l'ordre de la Noblesse & du peuple en la preference de leurs particuliers: Les Ecclesiastiques & vos officiers estans ià rengez par leurs dignitez, & par l'ordre de leurs receptions: car l'incertitude de preferences engendre presque toutes leurs quereles

& leurs plus sanglans débats : les vns voulans s'advantager & les autres ne voulant point ceder : sur quoy ils s'offencent en leur honneur, presumás tous de leur merite. Et ces offences qui sont les plus sensibles du monde, tournent leur raison en furie, qui porte les plus courageux à leur deffaiete, & les autres aux iniures & aux procès de toute outrance. Malheurs qui ne scauroient estre empeschez que par la distinction de leurs rangs, & l'ordre bien fait de leurs preferéces. L'effect en semble de vray mal-ayse, mais il est possible autant qu'il est necessaire : Car comme il ne se treuve point d'hommes du tout semblables en la nature, il ne s'en treuve point de tout pareils en la Police, qui n'ayent de remarquables differences en leurs qualitez, sur lesquelles on peut distinguer leurs merites, & ordonner leurs rangs.

Le peuple empoisonné de l'iniustice ne se contente pas de l'exercer contre soy, mais encor il en offense le Prince, & le public: Comme quand il descouvre aux Estrangers les secrets des villes & des Prouinces. Quand il tire l'or & l'argent (vray sang de l'Estat) hors du Royaume, & par ce moyen l'affoiblit, Quand il excede aux traictes foraines la permission, & vuide le pays des iustes prouisions qu'il y faut: quád il sort hors de ses rangs, peut vsurper ceux d'autrui: Quand les pecunieux en tēps disetteux achettent les denrées pour les reuendre à vn haut prix, mettent tout à sec & les pauvres à la faim: Quand les facquins se couurent comme les seigneurs, & les mecaniques profanent la foye & la richesse: Quand les peres par dots excessifs ruinent leurs maisons, & desolent leurs familles.

Vraymēt ces deux derniers excés, mais bien folies,

ont beſoing, Sire, de l'elleanor de vos Edicts: La premiere ſe guerira par l'obſervation de ceux qui ſont ià faiçts, & la ſeconde en ordonnant par vn nouueau, que les peres, pendant leurs vies, & qui auront d'autres enfans, ne puiſſent donner en dot à leurs filles plus que de leur legitime, à la prendre ſur l'eſtat preſent de leurs facultez.

A ces deux folies i'en adioute encore deux, la premiere l'Inconſtance du François à ſ'habiller, qui luy faiçt changer tous les iours de forme comme à vn Protee, & dépendre pour ſuiure le changemēt qu'il ayme, plus en vn an, que l'Eſtranger plus changeant en douze : Pour l'en guerir il eſt neceſſaire de le reduire à vne mode & forme ſtable d'habillement, la plus belle & commode à l'action qu'il ſe pourra: Or la plus approchante de la naturelle avec decence, ſera telle, comme la plus differente eſt la plus incommode & monſtrueuſe, à la iuger par la raiſon, & non par l'accouſtumance.

La ſeconde eſt l'imprudence de ceux auxquels la vanité ou le luxe fait deſpenſer plus que ne ſouffrent leurs moyens, & conſumer leur fonds: A quoy le Public a intereſt pour le mauuais exemple qui tire les autres à ce dōmageable excès: Et parce que ces prodigues tombez en indigence, & n'en pouuans ſouffrir les miſeres (pour auoir ſenty trop d'aile;) ſe tournent aux maleſicēs pour reuenir aux biens. Mais de cōſumer ſon fonds n'eſt pas touſiours imprudēce, ny folie, ny vanité: Car à ceux qui n'ont que de l'argent en biens, ſans induſtrie pour le faire valloir, comme ſont d'ordinaire la pluſpart des femmes & des orphelins, c'eſt vne deplorable neceſſité qui les contrainct de conſumer leur ſort, ou de le hazarder aux

dangers des Banquerouttes. Pour remédier à laquelle il n'est rien de si nécessaire & utile à la République que de faire dresser en toutes les bonnes villes des Banques & artisations publiques assurees des Vniuersitez, qui rendront de notables profits au public, & tiendront en assurance les deniers de toutes personnes incapables d'industrie aux intérêts legitimes. C'est ainsi que la nature prouidenté a formé dās le corps humain de propres vases & officines du sang & des autres humeurs, pour y entretenir & augmenter leurs masses, & apres en distribuer & rendre le profit à toutes ses parties pour les maintenir.

L'iniustice encore gaigne le chef apres le corps, & se treuve au souuerain mesme, Quand il mesprise les loix auxquelles il soubmet les autres : Quand il surcharge son peuple de nouueaux impôts sans nécessité. Quand il augmente par nouuelles crues les officiers de son Estat: Quand il regarde plustost au profit qu'à la iustice des aduis qu'on luy donne : Quand il consume ses finances en despeses vaines, & en excessiues liberalitez : Quand il faict la guerre meue de passion plus que de raison: Et quand il laisse le merite sans loyer, & reconnoist la complaisance, mesmement le merite des sçauans & des ingenieux, qui sont par ce mespris iniuste, descouragez de bien faire, au preiudice de sa louange, & du bien public. Quelle plus grande faute que d'abandonner les grands esprits aux tenebres, & laisser leur lumiere sous le muy qu'on voit luire par les fentes sans la mettre sur le chandelier? permettant que la fuye l'estaigne à faute d'air: Les beaux Esprits en vne fortune incommode ressemblēt à l'or & aux diamans dans la mine, qu'il faut tirer de leur roche pour iouir de leur

prix:

prix. Mais ce sont auiourd'huy perles sur le fumier
 que les coqs de la fortune picottent; & iettent des
 piez en arriere pour ne cognoistre leur valeur. On
 ayme l'action pour estre vtile; la disposition pour
 estre commode; & de l'inuention des grands esprits
 qui donne aux deux autres leur subiect; qui perce le
 ciel & la terre; qui a fait au monde tout ce que l'art
 a fait; & qui doit parfaire tout; on n'en tient compte
 ô aueugle iniustice!

Je veux maintenant parler de la Maladie, mais de
 la populaire seulement, qui souuent l'afflige & de-
 peuple calamiteusemēt à faute d'ordre & de secours.
 Elle est generale, & particuliere; c'est à dire qui vient
 presqu'à tous à la fois d'une cause vniuerselle; ou par
 succès de l'un à l'autre d'une particuliere. Et prenant
 icy leurs premiers effects pour leurs causes; le dy que
 la generale est l'infection de l'air qu'on appelle pe-
 ste: & la particuliere l'impureté des homes, que l'on ap-
 pelle contagion. Quand à la premiere, on estime
 que c'est vne corruption & venin de l'air, qui vient
 de l'influence & mauuaise constellation du ciel: mais
 c'est vne visible erreur; car l'air de soy pour estre vn
 corps simple & incorruptible: Il peut estre infecté
 mais non pas corrompu: Et les astres sont trop purs
 & reculez de luy pour le corrompre & enuenimer
 par leur irradiation. Doncques ce premier mal n'est
 point la corruption de l'air, mais son infectiō procé-
 dant de la putrefaction relante de plusieurs animaux
 morts, exposez longuement à l'humeur & chaleur
 du ciel, de laquelle sort vne vapeur maligne qui infe-
 cte l'air, & blesse les autres animaux de mesme es-
 pece qui se rencontrent dans la sphere de son venin
 disposez à le receuoir, comme si elle procedde des

- hommes son venin ne blesse que les hommes seulement, ou si de quelqu'autre espece il ne blesse que celle-là. Ceste infection s'engendre, comme i'ay dict, des animaux morts & non des vifs, par ce que le baume de la vie empesche la corruption de la substance animale qui la cause. L'antiquité reconnoissant que ce poison mortel sortoit des morts, les brusloit pour en preuenir l'origine; & encor les Orientaux le font pour se garentir de cest effroyable mal, sa malignité se rend d'autant plus dangereuse que les animaux dont il sort estoient moins purs & plus souilleez, mais sur tout s'ils sont morts de venin ou de poison, car alors l'infection accroist ses forces des qualitez du venin estrange auquel elle est meslee, & se fait plus aigue & pestilente d'une propriété inconnue que luy donne le poison qui la qualifie.

I'ay dit aussi que ceste infection ne blesse que ceux de son espece qui sont disposez à son effect: Parce qu'il faut que son venin ait vne similitude spécifique, & vne indiuiduelle analogie avec le sujet qu'il attaque, esquelles gist la propriété de son action. Il blesse fort & peu, loing & pres, selon la force & diffusion plus ou moins grande des cercles de son activité: Et de ceste sorte il forme ou la peste ou la peste exquise par son intiction, ou les autres maux epydémiques par sa remission. Calamitez affreuses qu'il faut empescher & preuenir avec diligence, & bon reglement, faisant promptement enterrer les corps vraiment morts dans des fosses fort profondes, mesme ment quand il en y a grand nombre, comme il aduiuent par la guerre & autres mortalitez de la multitude, ou s'ils sont suspects de lepre ou de venin: prenans bien garde qu'ils soient hautement & so-

lidement couuerts; afin que l'air, l'eau, ny le chaud ne les puissent atteindre, ny leur pourriture exhaler ses vapeurs; Et que dedans les fosses & sepulchres ils ne soient point accumulez, d'autant que l'infection de plusieurs corps vnies, est plus forte que si elle est diuisee par leur dispersion. Par ou l'on voit que l'usage des charniers & vories humaines est tres-mauuais: Il se faut aussi prendre garde de n'ouurer iamais les sepulchres & descouurir les fosses pendant la putrefaction des corps qu'on y a mis, par ce que les exhalations qui en sortent sont tres-venimeuses: car comme la substance humaine est la plus parfaite composition de la nature, sa corruption est aussi la plus forte: & comme les esprits de la vie sont les plus vifs & meilleurs qui soient, les venins de sa desfaiete sont les plus pernicioeux. Et par ce que ceste virulence gist en vne vapeur subtile & onctueuse; si l'air est espais & froid, elle se rend viscide, s'attache, se porte, & se conserue en tous corps; s'enflammant aussi tost qu'il touche l'animal à nu par sa chaleur naturelle: A cause dequoy il faut vzer de forts & grands desechemens de feux, pour en purger les corps & l'air continuellement, faisans dresser de lieux publics bien esloignez des villes, pour la retraicte & cure des blesez, qu'on doit faire secourir aux despens du public, puis que le peril est commun.

La seconde Maladie Populaire est vne impureté des hommes souilleez & corrompus de nature, ou par accident, qui par contagion & meslement de corps ou d'esprits, contaminent & gastent les sains qui les accointent: Mais cecy arriue plus es meslemens naturels des hommes avec les femmes, qu'en l'accointance commune des hommes avec leurs sembla-

bles, ou des femmes avec leur sexe: Par ce qu'és ceu-
 ures des premiers meslemens, les esprits naturels &
 animaux des parties sortent au dehors, & s'unissent
 si fort ensemble qu'ils sont inseparables en leur re-
 traitte, passans en vie dans leurs nouveaux subiects,
 qu'ils meliorent s'ils sont meilleurs, & empirent s'ils
 sont pires. C'est en ce meslange de sexes, que le grain
 est semé de ces intimes & opiniastres maladies es-
 quelles la Medecine ne voit goutte, & la Chirurgie
 ne peut rien. Il est donc bien necessaire de se prendre
 garde d'un exacte soing qu'en la communion Pu-
 blique, ces personnes contaminees ne se meslent
 jamais avec les saines: & de faire d'exactes verifica-
 tions, au moins des formez lepreux, & des femmes
 prostituees, & notoirement gastees, pour les separer
 de l'accointance & alliance des autres. Et par ce que
 l'impuissance est si grande en des hommes qu'il y a,
 & si grande l'incontinence des femmes debauchees,
 qu'il n'y a moyen de les priuer des effects de leurs
 sens, sans les porter à d'autres plus dommageables.
 S'il y a plus de bien que de mal à leur en permettre
 l'usage: il faut que ce soit avec tout l'ordre, distin-
 ction & netteté, qu'y apportent les autres nations
 bien policees, assignant des lieux & logemens separez
 à ces femmes de necessité. Et il ne faut point douter
 que par leur separation la chasteté des autres ne s'en
 porte mieux, que leur honneur ne soit en plus grâde
 assurance, & que la Pureté, fille de la continence, &
 mere de la santé, ne nous soit plus familiere qu'elle
 n'est: Pureté qui red nos esprits incorruptibles, & nos
 corps inalterables, semblables aux meraux parfaits,
 qui ne se rouillent ny noircissent jamais s'ils ne sont
 meslanges des pires. Pureté qui amande les souillees

autant que l'impureté les souille. Ce qui me fait dire sur ce sujet, que l'homme est à l'homme le souverain bien ou le souverain mal de la vie.

Il y a vne autre dangereuse contagion qui travaille & incommode l'Estat extremement, venant des pauvres souffreteux, principalement des mandians que les Magistrats politiques laissent vaguer par les villes, puans, sales, & malades; souffrans qu'ils arrestent les passans, penetrent les maisons, assiegent les portes, entrent dedas les temples, & se meslent par tout: troublans les œuvres saintes, & profanes, par leur importunité, & infectans lieux & personnes par leur impureté. Ce qu'il faut diligemment empêcher & pourvoir à ces incōueniens, qui sont les plus frequēs de tous. Il y a de deux sortes de pauvres, de vrays & de faux, de bōs & de mauuais, d'inualides & de puissans, de honteux & d'effrontez: Les vns sont enfans de perdition, & les autres de desolation. Ceux la guetteurs de pas, larrōs industrieux, bouteux subtils, semeurs de peste & d'engeance: Ceux-cy spectacles de la misere, obiects de la compassion, buttes de la calamité, & vases de l'infirmité des hommes, & c'est de ceuxcy, (soient manifestes ou couuerts) qu'il faut auoir pitié, qu'il faut soigner le secours, & releuer l'indigence: Dieu le nous commande & la nature nous y semond. Et quoy que la fortune les reiette comme excremens, que le monde les mesprise, & que le sort les tyrannise, il n'en faut iuger la cause par le traictement, ny le merite par la peine. Il leur faut estre humains, puisqu'ils sont hommes cōme nous, & leur dōner de nos substāces, puisqu'ils sont de nostre nature, Et à cest effect dresser par tout des Hospitaux garnis de toutes choses necessaires: mais sur

tout de fideles receueurs & distributeurs de leurs
 reuenus, qui pourroient exiger en quatre questes de
 tous, ce que leur charité leur fait donner en toute
 l'année, pour l'entretien seulement des pauvres im-
 puissans, & malades, auxquels il ne faut plus qu'il soit
 permis de vaguer par les villes, sur peine que les ma-
 ladies y regneront tousiours. Et quand aux sains &
 valides, i'entens des pauvres volontaires, & quaimas
 de profession, qui sont la virulence des hommes, &
 les immondices de l'Estat, desquelles tout mal exha-
 le, Il les faut distinguer des vrays & inualides, cōme
 les frellōs des mouches à miel, afin qu'ils ne māgent
 leur substance. Il en faut purger l'Estat, afin qu'ils ne
 le gastent par leur ordure: faisans comme la preude
 Oeconomiste, qui à son leuer fait balayer son logis,
 & nettoyer les chābres de toute saleté, pour le ren-
 dre sain & agreable: Ainsi faut-il pour bien com-
 mencer l'Oeconomie publique, la purger auant tout
 œuvre de ses faineans, & à eux de leurs vices, en les
 retirant de l'oyfueté qui les cause. Il leur faut oster
 le libertinage pour les afferuir au travail, avec effort
 s'il en est besoin: les employer aux œuvres & mes-
 tiers publiques; qu'il est necessaire d'introduire à cest
 effet, selon la disposition & commodité des lieux,
 aux despens du public, sans y rien espargner pour
 vn si grand bien. Et s'ils résistent, chastier ceux qui
 ne se voudront reduire, punir au fouët les obstinez,
 marquer aux lys les outrageux: & donner la rame à
 tous ceux qui refuseront l'outil, les faisant seruir aux
 Galeres, s'ils ne veulent trauailler aux villes.

Ce sont les deffauts plus grands que ie remarque
 en ceste Monarchie les ordinaires maladies de son
 corps, & les vices plus apparens de ses membres. Ce

font les mauuais tons de son concert, & les discors de la Diatonique.

Mais c'est à vous, Sire, souuerain Medecin, & souuerain Musicien, de guerir son mal, & remettre sa dissonance. C'est à vous Artiste nonpareil de cest Estat (que vous tenez avec l'art de bien régner du plus grand Maistre qui fust iamais) de redresser ses pieces faucees & r'adjuster les rencontres: C'est vn Horloge desbauché, mais de grande importance; car il frappe les heures & regle le temps à toute la Chrestienté. Reparez le donc, Sire, à perfection, & faictes qu'on l'entende avec estonnement de tous les quartiers du monde. Consommez nostre felicité commencee par vostre Pere, miraculeux ouurier de nostre paix, il vous a laissé la moitié de l'ouurage à faire, acheuez-le, Sire, & comblez nostre bon heur: Vous le ferez aysément en prenant les qualitez dont vous auez les dispositions esgales en leur difference à celles de ce grand Roy: Il estoit le miracle des ames, soyez la gloire des bonnes loix: Il chassa les ennemis de la France, chassez les vices de vostre Estat, il sauua nos fortunes par sa force, sauuez nos droicts par vostre equité: Il ayma la vaillance & la clemence, aymez la Iustice & la Pieté: & comme il s'aquist le surnom de Grand, vous acquerrez celui de Iuste pour iamais, & rendrez vostre nom saint au ciel & dans le siecle.

Il reste, Sire, que les fideles Ministres de vostre direction, ces tant prisez & capables Conseillers de vostre Majesté, Cooperateurs de nostre bien que Dieu vous reseruoit & à nous pour ce temps: Colomnes inefbranlables de vostre autorité, vous aydent sans cesser à ceste grand' œuvre de laquelle vo-

32
stre parole, les anciennes Propheties, & les signes
de toutes choses promettent le succès, c'est à ces
bons iardiniers à cultiuer avec tant de soin, en ce
grand Parterre, vostre Royale fleur, l'amour des
Anges & des hommes qu'elle remplisse toute la ter-
re de ses graces, & des delices de son odeur. C'est à
ces experts & sçauans Pilotes, qui cognoissent les
vents de la France, & les routes de sa haute mer, &
à ces autres nochers d'elite qui sçauent les plages
esloignées, & leurs dispositions, de guider ceste grã
Nef qui vous porte, & avec vous nostre salut, au
port de son assurance. Et c'est à tous, Sire, à trauail-
ler si courageusement sous vostre effort à l'entre-
prise de ceste generale Reformation, que vostre re-
gne soit fait vn siecle d'or, parfait de nostre bien, &
remply de vostre Gloire.

